

**Uunga siunnersuut: Nunaoil A/S pillugu Inatsisartut inatsisaata allan-  
ngortinneqarneranik Inatsisartut inatsisaat**

*Aatsitassanut Naalakkersuisoq*

**pillugu**

**Inuussutissarsiornermut Aatsitassanullu Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISSUTAA**

Inuussutissarsiornermut Aatsitassanullu Ataatsimiititaliap suliarinninnermini kingullermik ilaasortarai:

Inatsisartunut ilaasortaq Peter Olsen, Inuit Ataqtigii, siulittaasoq  
Inatsisartunut ilaasortaq Randi Vestergaard Evaldsen, Demokratiit, siulittaasup tullia  
Inatsisartunut ilaasortaq Nicolaj Jeremiassen, Siumut  
Inatsisartunut ilaasortaq Jens-Erik Kirkegaard, Siumut  
Inatsisartunut ilaasortaq Knud Kristiansen Atassut  
Inatsisartunut ilaasortaq Kelly Berthelsen, Inuit Ataqtigii  
Inatsisartunut ilaasortaq Per Rosing-Petersen, Partii Naleraq

**1. Siunnersuutip imarisaa siunertaalu**

Nuna Oilimi siulersuisunut ilaasortat amerlassusiisa ataatsimeersuarnermi naleqqussarsinnaanissaannut siunnersuut periarfissiivoq. Maannakkut Inatsisartut inatsisaat atuuttoq malillugu ukiut marlukkaarlugit siulersuisunut ilaasortat tallimat qinerneqartartussaapput. Siunnersuut malillugu siulersuisunut ilaasortat tallimaanissaannik aammalu ukiunut marlunnut toqqaasarneq pillugit immikkut maleruagassaq atorunnaarpoq. Taamaalilluni inunnik tallimanik toqqaasussaatitaaneq pillugu immikkut maleruagassaq ataatsimeersuarnermut pituttuisuujunnaarpoq, tamatumunngali taarsiullugu ingerlatseqatigiiffinnut inatsit nalinginnaasoq naapertorlugu siulersuisunut ilaasortassanik aalajangersimasumik amerlassusilinnik ataatsimeersuarnermi qinersisoqarsinnaassaaq, inatsimmi tassani siulersuisut ikinnerpaamik pingasunik ilaasortaqaarnissaat piumasagaataalluni.

Kiisalu siulersuisunut ilaasortat qullersallu kulbrintinik misissuineq atorluaanerlu pillugit ilisimasaqarnissaannik piumasagaat siunnersuutikkut aamma atorunnaarsinneqassaaq.

Siunnersuulli malillugu siulersuisunut ilaasortat qullersallu inatsisinut, aningaasaqarnermut inuussutissarsiornermullu tunngasunik suliatigut qaffasissumik ilisimasaqarnerminnik uppernarsaanissaannik piumasagaat sulii atuuppoq.

## **2. Inuussutissarsiornermut Aatsitassanullu Ataatsimiititaliap siunnersuummik suliarinninnera**

Siullermeerinninnermi siunnersuut tapersorsorluarneqartoq ataatsimiititaliamit maluginiarneqarpoq.

Ataatsimiititaliamit maluginiarneqarpoq siulersuisunut ilaasortanut piumasagaatinut tunngatillugu ataatsimeersuarnerit siunnersuummi kiffaanngissuseqarnerutinneqartut. Siulersuisunut ilaasortat kulbrintinik misissuineq qalluinerlu pillugit ilisimasaqarnissaannik piumasagaatit Inatsisartut inatsisaanni atuuttumi aalajangersarneqarput. Siunnersuulli malillugu siulersuisunut ilaasortat qullersallu inatsisinut, aningaasaqarnermut inuussutissarsiornermullu tunngasunik suliatigut qaffasissumik ilisimasaqarnerminnik uppernarsaanissaannik piumasagaat sulii atuuppoq. Siunnersuulli malillugu siulersuisut ilisimasaat pissutsinut kulbrintinik misissuineranut qalluinerullu immikkuullarissumik tunngassuteqarnissaat piumasagaataajunnaarpoq.

Siulersuisunut ilaasortanut piumasagaatinik iluarsineq Nunaoil A/S-imi pisortanut piumasagaatinut sunniuteqarpoq. Inatsisartut inatsisaanni atuuttumi § 5, imm. 1, oqaaseqatigiit aappaat malillugu inuit minnerpaamik siulersuisunut qaffasissuserititanut nallersuuttumik qaffasissusilimmik suliatigut piginnaaneqarluartut uppernarsaaserneqarsinnaasut kisimik pisortatut atorfinitsinneqarsinnaapput. Taamaalillunilu siunnersuuttip malitsigisaanik pissutsit kulbrintinik misissuineranut qalluinerullu tunngassuteqartut pillugit immikkuullarissunik ilisimasaqarnissamik piumasagaat siulersuisunut ilaasortanut atorunnaarpoq. Piumasagaat taanna taamaalilluni siulersuisunut ilaasortanut atuukkunnaarmat aamma pisortanut tunngatillugu piumasagaat atuukkunnaarpoq.

Siulersuisunut ilaasortat qullersallu kulbrintinik misissuineq qalluinerlu pillugit immikkut ilisimasallit, Kalaallit Nunaanni kulbrintimut tunngatillugu maanna ingerlataqassutsip tamanna ajornartissanngippagu aningaasaqarnikkut tunngavissat iluini inuit taamaattut sulisussarsiarisinnaassappata, sulii atorneqarsinnaassasut Naalakkersuisut siunnersuummut nassuiaatini erseqqissaatigigaat Inuussutissarsiornermut Aatsitassanullu Ataatsimiititaliamit immikkut maluginiarneqarpoq.

## **3. Tusarniaaneq**

Tusarniaanermut piffissaliunneqartoq; 2017-imi 28. februarimit 8. marsimut; tusarniaaffigisanit arlalinnit uparuarneqarsimasoq ataatsimiititaliamit maluginiarneqarpoq. Tusarniaaffigisat uparuagaat ataatsimiititaliamit isumaqatigineqarpoq.

Ataatsimiititaliamit aammaarluni uparuarneqassaaq inatsimmik tusarniaaneq



Naalakkersuisunut nukingisaarutitut isigineqassanngimmat, ima paasillugu Inatsisartut ataatsimiinnissaannut tunniussinissamut killiliussap naajartornera pissutigalugu Naalakkersuisut tusarniaanermut killiliussaq sivikilliinnarsinnaanngikkaat. Tamatumunnga taarsiullugu inatsimmut nutaamut allanngukkamulluunniit piffissaq atorneqartussatut pilersaarutigineqartoq aalajangersarneqartillugu Naalakkersuisut peqqissaarnerusariaqarlutillu piviusorsiornerusariaqarput. Tusarniaaneq inatsisiliornermi pingaaruteqarlunilu qitiulluinnarpoq, tamannalu isiginiarneqanngippat tamat oqartussaaqataaneranni tunngavissat aammalu inatsisiliornerup pitsaassusissaa sumiginnarneqaratarsinnaapput.

#### **4. Pisortanut aningaasaqarnikkut allaffissornikkullu kingunerisassat**

Namminersorlutik Oqartussat Nunaoil A/S-imi siulersuisunik akissarsiaqartitsineq pillugu politikiat malillugu siulittaasoq ukiumut 150.000 kr.-inik, siulittaasup tullia 75.000 kr.-inik nalinginnaasumillu ilaasortat allat 50.000 kr.-inik akissarsiaqartinneqarput. Taamaattumillu assersuutigalugu siulersuisunut ilaasortassat pingasut toqqarneqarpata Nunaoil A/S ukiumoortumik 100.000 kr.-inik sipaaruteqartassaaq, taakku siulersuisuni inissat marluk naligaat. Aammattaq suliat eqqarsaatigalugit siulersuisunut qullersanullu piumasaqaatinik naleqqussaasoqarnera qullersanut aningasartuutit appartinnissaannut periarfissiissaaq.


#### **Ataatsimiititaliap inassuteqaatai**

Ataatsimiititaliami amerlanerussuteqartut Inuit Ataqtigiit, Siumup Partii Naleqqallu ilaasortaataa siunnersuut **akuerineqassasoq** inassutigaat.

Ikkerussuteqartup Demokraatit ilaasortaataata matuma kinguliani allassimasunik oqaaseqaateqarluni siunnersuut **itigartinneqassasoq** inassutigaa.

Siunnersuutip ilusiligaaneranut tunngasumik allannguutit Demokraatit isumaqatigaat, siulersuisunullu ilaasortat qullersallu kulbrintinik misissuineq atorluanerlu pillugit ilisimasaqarnissaannik piumasaqaatip qasukkarneqarnissaanut peqataasinnaanngilagut. Nunaoil A/S-immi suliassaa pingarneq tassaavoq kulbrintinik misissuineq atorluanerlu pillugit suliaqarneq. Taama pingaartigisunik atorfeqarnissaminni siulersuisunut ilaasortat qullersallu pisariaqartunik piginnaasaqarlutillu piukkunnassuseqarnissaat pingaaruteqartoq Demokraatit isumaqarput. Siunnersuutip matuma akuersissutigineqarnerata kingunerissavaa siulersuinut ilaasortassat pisortassallu pisariaqartunik piginnaasaqanngitsut toqqarneqaratarsinnaanerata. Tamanna pitsaanngilaq. Tamannalu tunngavigalugu siunnersuut itigartinneqassasoq inassutigaarput.


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.




Peter Olsen, Siulittaasoq

---


Randi Vestergaard Evaldsen




Nicolaj Jeremiassen



Jens-Erik Kirkegaard



Knud Kristiansen



Kelly Berthelsen



Per Rosing-Petersen

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.


---

Peter Olsen, Siulittaasoq



---

Randi Vestergaard Evaldsen




---

Nicolaj Jeremiassen

---

Jens-Erik Kirkegaard



---

Knud Kristiansen



---

Kelly Berthelsen

---

Per Rosing-Petersen